

Duško Geić  
(1943) TROGIR

O REDIKULIMAN, LAJAVICAMAN,  
TOVARIMAN I JOŠ NIKIN STVARIMAN

*Dvi o lajavicaman*

Jema po ure  
da nima višje kiše  
a one užegle  
i o čakul zapajene  
još vavik tiščidu  
otvorene lunbrele.

o o o

Iša san u grad a one su stale  
sa maštiliman na se o' p'edesē  
jenu tuseru i jenu štranbu raspravljale  
— žali in, bože, ono dicē —.

Ka' san se vratija poslin dvi ure  
još su na isto misto stale  
rukaman mavale,  
glavaman micale da se ne iskrēne  
i još vavik one dvi »kolore« raspravljale.

Poslin su došle doma  
i još sa vrāt o' dvora  
zvale dicu za skalat  
jerbo da jedva višje moredu o' truda  
na noge stāt.

*Dvi o redikuliman*

Po cili dan se vrtidu ka mulelin,  
jenōga zovedu Fabo a drugi je Martin,  
sami sa sobon raspravjadu,  
dica in govoru da su »na bevandu«.

Glavni je Martin  
a Fabo gre za njin  
— je, dušo moja, kako nije —  
stalno mu begena i potvrdije.

Parī se Fabi da je Martin  
na svitu najpametnije cejade  
a težaci o'nedije su ova dva redikula  
cinidu smīj i svake monade.

o o o

Govorija je Duje  
i pametne i lūde  
bija je vej star  
i ka volija je cure.

Rekle su mu jenōga dana  
neka se kupat grē,  
(smišno, puno smišno je pliva)  
smijale se ka' je iša šoton vodē.

Cila pontomina svršila je brzo  
uz iste glumce ka i jucēr, i prikjucēr,  
uz isti smīj njiov,  
ma, ovoga puta, brez Dujē.

*Dvi o jarpaman*

Spominjete li se kako je Ante  
cili život kupija jārpe,  
sta je u našu štradu  
i bija kriv na jenu bandu.

Odija je bokūn naget  
da se more lakše sagēt  
ka' mu je tribalo  
jārpu skupit u saket.

o o o

Ka' je bija dan o' panzara  
koja je to bila fešta,  
a pun je bija grad  
tovari i mazāk.

Čekali bimo na tir za vidit prvi  
da koja beštija potribu cinī.  
Otomen bi pripala jārpa  
ca se apena rajala.

I za bit prvi  
nije vajalo samo vidit  
nego i na vas glas vikat:  
— Eno cinī! moja jārpa! —

A beštije bīdne  
gl'edale su ca oto oće reć  
da se mūlci oko njik muvadu  
i o sebe šimje cinīdu.

*Poza kišon*

Kiša je  
svu noć padala  
i nikor nije  
u poje iša.

Svi su težaci  
pri našon kućon  
i cinīdu smīj  
sa ludin Martinon.

Dida bolestan leži,  
šaje me da vidit grēn  
ca je to doli na štradu.

— Tucu se, dida, rvati i tolomaši! —

Do pe' minuti  
— bija san zaudobija —  
otēgnuto su puno muke  
zovē me ope' dida.

A ka' san doša,  
dobija san šćāp  
jerbo se bija sitija  
da nisu višje ona  
njegova vrimena.

## *Prošćenje*

Zdravamarija je rebatila  
jena cuvita je na kanpanel doletila,  
nicigova duša će odletit nočas  
jerbo se sinjalon cuvita javila.

U kuću škripije pod i niko jeca,  
stojidu sprēmijene šterike  
i na komonu dva lumina  
a cuvita je donila glas  
da će niko umrit nočas.

A oni ca su š njñ  
služili marinu i igrali briškulu  
dolazidu po jedan do posteje  
i iskedu o' njega prošćenje.

— Prosti ako san te uvridija —  
— Ma nima 'tō ništa, Andrija —  
— Prosti mi ako je ca bilo —  
— Ma ajde, Frane, oli smo dica —.

A susidu Marinu:  
— Vavik smo živili u slozi  
i niman ti ca prostit,  
jedino ca si u klapu  
dikodir škiva platit —.  
I jope se javila cuvita...

## *Još jena o didu*

Dida je krčija da bi zemju kupija,  
— da bi kupija komad zemjē pūle —,  
kako je cili život govorija.

Zna san ca je to »zemja pūla«,  
zna san kakī more izāc vinograd  
i kakī su to rebi, ka' se iskrči,  
napala i urēdi ota pūla zēmja.

Poslin mi se mišalo u misliman  
ka' san dozna da je nidir ravna Apulija  
i sve san mislija da je isto:  
zemja pūla i Apulija.

More bit da se didu, ka' je napalava do prsiju za  
svoju lozu,  
nije nika snilo o pojima, pojima žita,  
a jã san, ka lūd i vavik mislija  
da je isto: zemja pūla i Apulija.

*O tovariman*

Kupija Andrija tovara,  
ma koliko će vako debel bit  
ka' će cili vik  
samo lozje grist.

Ma ni Andrija nije kriv  
da nīma u kuću bože — tebe  
nego cili život grē  
u tūjih na žurnate.

o o o

Jě nesriknja tovarska sūdba  
ka' se za svaku gospodarovu nevoju  
vavik po njemu būba.

*Koza*

Popegla se na tapinu prviman,  
pa gori žvelto brstī,  
ka cejade mice justiman  
i puno mi se juski parī.

Glavōn osinjak onondila,  
gleda, stojī, mucī,  
ka da je u velike misli,  
ca su se po ovōn žegi  
osinci uzvirili.

*Bojna*

Prin ven dōješ doma,  
u dvi u tri ure,  
dugo strajon virin  
kroz bužu o' škure.

Ka' mi dōješ napit  
i crjena lica,  
vej znan ca me ceka,  
vej nan placu dica.

#### *Novitad*

Kuma Frane je donila novitad,  
o tomen govori deboto cili grad  
i loža, i panzār, i kafetarija,  
don Duje je iša na ditinjstvo,  
don Duje je iša...

Ma i nije puno svēti bija,  
stāri, pokvāreni jarac,  
ko znā cigovu je sve ženu jema,  
najskoli za onoga rata...

Ovo mu je božji kaštig,  
'slobodi, bože, i pasa.

#### *Težaci*

Jema težāci  
ca jin je cīlu godinu vino zerbo,  
jerbo oli ga ne pritācu  
oli ne duperadu sunporacu.

Ma, inšoma, kako jē da jē  
ko kod da u njik dōje,  
oma mu se nuđu napit  
i stanedu se vinon falit.

A drugi su jope stritni  
jerbo ka' se maston platidu konti,  
jema će se napi do nove trgnje,  
samo ako se vino uzōsti.

#### *Vino*

Ka' se dāš napi' kumome Ivi,  
pa da ti je vino zerbo ka osto,  
jope će reć da je jupko i lipo  
i da se pije kakoko mliko.

### *Pleti kotac*

Pleti kotac ka i otac —  
govorila je kuma Kate.  
Pleti kotac ka i otac —  
govorija je i kum Frane.

I zaradi otoga je njiov Šime  
odija vavik u poje  
i nije iša na zanāt,  
ni u skulu daje,  
zaradi otoga je osta zanji  
izmeju svē  
osibarske mularije.

### *Pakal*

Snilo mī se da san umra  
i u pakal svršija.  
Jo meni, judi moji, straja!

Sve nike tunbine,  
a u njima onondije i rebunbaje  
ka da kokod odozgār i odozdāl  
mināje i lagume bacije,  
ka da tucu svi gromi svetoga Ilije.

Ka' zapan me probudija šušur o' kara  
di me otac bija kla  
ka' smo partili izjutra  
u Kobijak takice bra'.

### *Ribaščina*

Ka' san tréicon vata ribu  
na Māli mūl, oli na Žudiku,  
nika nisan volija da m'e pitadu  
jesan li ulovija ca.  
Takiman san vavik ogovara  
da san apena, ovi tren ariva.

### *Kalma*

U ure o' kalme  
opustidu kale,  
pasi ka da krepaju

a judi na žegu bogaju.  
Gluva je čila kala  
a apena će za bot bava.

Krātki stojidu osini  
ka da su o' mrci stražari,  
u paukovu mrižu branceluša zvonī  
a sve se drugo mrtvo pari.

### *Starina*

Naš je tovar vej star,  
pase navrj brine,  
jo, bojimo se da ne sklizne  
jerbo ca bismo mi dica  
brez njega i brez dide.

A sve nan se pari  
u 'vo novo vrime  
ka' nestane tovara,  
nesta će i dide  
ka dvi zanje stvāri o' starine.

### *Suša*

Hrčedu kroz ponistre u ponen  
artišti, oficijali i kalafati,  
pušedu stāri i penšjunati.

Već je dvanājsta setemana  
da nima kapī kiše,  
gorī nebo i piščina zemja  
ni vinograd ne more višje.

A ispo maslin u poje  
snijedu težaci na kaparane  
da je ulila i natopila  
da se zemja napila,  
da je zrno nadojila,  
da će intrada bi brzonz zdrila  
i da će u konobe dōć cila  
i nečedu višje gleda' gori  
je li se nevoja nad vinograd nadnila.